

sensilis, quam intellectualis istius desiderii, quo ad divinarum rerum cognoscendarum contemplationem rapitur mens. Nam dispersa per totum poema sunt satis exigua anagogici sensus vestigia. Quam ob causam nimis urgere nolui singula poetae verba, et incertus haereo in nonnullis, utrum mystice accipienda sint, necne. Exempli gratia nomen nunciam, quae si praeter poeticum sive dramaticum usum alius rei causa sit exhibita, perceptionem vel memoriam significare debet. Indi utramque rem eidem mentis facultati मन्त्र attribuant. Sed haec et alia doctioribus aut talium disquisitionum amantioribus enucleanda relinquo.

Restat quaestio, ad quamnam religionis Indicae sectam et ad quamnam philosophorum scholam pertinuerit Jayadêvas. Prima facillima est diiudicatu; nam praeter hymnum qui initio positus est in honorem Vishnuis, ad Harem et Laxmîda fine carminis recurrit poeta (XII. 27.); unde satis apparet, eum non esse eorum, qui Krishnam et Râdham ad Vishnuis et Laxmîdos dignitatem evehant eosque summi numinis loco ponant. Divina tribuuntur Govindae opera per Gîtagovindam, sed totum numen non est neque ei tota numinis maiestas tribuitur. Errant itaque qui ad adoratores solius Krishnae et Râdhae poetam nostrum referant, licet non infitias eam, eum praecipuo cultu hasce Vishnuis formas fuisse prosequutum. Cf. I. 12. cum annot. et quae mox de isto loco addam. Altera magis est intricata, at id statim manifestum est, Jayadêvam non legitimae cuiusdam scholae, ne Vêdânticae quidem, placita per hoc poema professum esse. Sunt autem mixti generis philosophi, Pâncharâtri dicti, qui, uti supra observavi, doctrinam tenent e religionis Vishnuiticae dogmatis et philosophorum placitis commixtam. Horum placita si Jayadêvae non fuere, prorsus similia certe eius animo obversabantur. Res est mihi satis veri similis, quamvis haud nimis accurate de Jayadêvae philosophia statuendum esse reor. Ipsa Pâncharâtrorum doctrina brevius exposita est a Colebrookio. Summum numen Vâsudêvam, sive *Bhagavantam* dicunt; Krishnam etiam appellant. Colebr. l. c. p. 576. Mythologicis nominibus partim sibi propriis, partim com-